

ASO LUA, 26 APERILA 2022

Na tauaofia le Fonotaga a le Fono Aoaofaitulafono i le itula e 9:27 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene, ua tuuina atu nei le Faaaliga i le Fono Aoaofaitulafono mo le iloiloaina o le Tulafono Tau Faaofi ua faaaliga i inei:

1. Tulafono Tau Faaofi o Teuteuga o le Tulafono o Sootaga Va Lelei o Leipa ma Galuega 2022.

Tuuina atu i lenei aso 25 o Aperila, tausaga 2022.

Sainia: Hon Fiamē Naomi Mataafa
TAITAI O LE MAOTA.

FOFOGA FETALAI: Ia, e manatu o le a muamua ia ona ou taia Ulusinave ma ou pale Ulumotootua ae tofia faualo pei o faiva leiloa ma faiva lililo o Salemuliaga. Ou te sii foi lou vaa e aga ma ou ula le muiaa ina ne i sopolagi le malu a le Tapuitema, a o lele ua talatafaifa le Maota e pei o le nofoa na solosui ae seei i le malae i Tiafau o le faautugatagi a Samoa, o lea ua nofoia sua ma auoloolo ua tafaitoa atisa o Maota, aua le fonousu a Samoa, o le maota e suaaleaga i ai fue faamataataa o faleupolu. Ona ou faatulou lea, i le afio o le Taitai o le Malo ma le Aiga Kapeneta, ae tainane le siapo faasau o Minisita Lagolago, afio le Taitai o le Itu Agai ma le mamalu o sui usufono o le Palemene.

E faatalofa atu foi i le Susuga i le Loia Sili ma lona auvaa, faapea sui o Matagaluega ua auai mai. E le mafai ona ou tiu faavaa o le tai matamataloloa, ae se i ou afe ane i le tapuaiga mamalu a Le Ao o le Malo ma Lana Masiofo, le Sui Ao ma lona faletua, le paia maualuga i Itutino Fefaatauagai o le Faigamalo, o paia aua Aiga ma latou Tama, Tama ma o latou Aiga, Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le tapuaiga a le Motusa aua le afifio o Sua ma Vaifanua, Fofu ma Aitulagi, Saole ma Saleaamua ma le Launiu na Saelua, le Laau na Amotasi, le Faatui o le Motu, le Faleula i le Tauaitu ma le Faleula Tautagata, ma upu i le Manuatele. Ae faamatua le tuu i le fatulegae ma malotumau i auauna tofofi a le Atua o lo o faatunapaulia i so o se fatafaitaulaga, ula e ula, pale e pale, ua o tatou toe ulumeafatufala i le alofa ma le agalelei faaaliali o le Tapaau Sili i le lagi. E ofo alofa atu ma faatalofa atu i le suafa manumalo o Iesu Keriso o le Ao o le Ekalesia, manuia le usugafono i lenei taeao, manuia le tapuaiga a le atunuu.

ISI FAASILASILAGA A LE FOFOGA FETALAI

FOFOGA FETALAI: O le a faafofoga le tatou Maota i lenei taeao, o lo o faaauau pea ona faataatia i le Laulau a Fono ia Poloaiga o Faalavelave Tutupu Faafuasei. E i ai foi le talitonuga ua tatou silafia uma aiaiga ua faatulaga mo le puipuiga o le faamai Koviti-19. O lo o faaauau i le taeao nei nisi o galuega ua faatulaga e le tatou Ofisa mo le faia o suega, tests mo le mamalu o le Palemene. O lea foi e auai mai sui o le Matagaluega o le Soifua Maloloina, e mafai foi ona lagolago atu i le galuega o lo o feagai ma le tatou Ofisa.

O ananafi i le tatou Pre-Sitting sa faatino ai tests mo lo outou mamalu, pe afai e i ai se sui usufono e le i auai mai ananafi ma e le i faatinoina foi sana test, o lo o maua le avanoa i le maota e masani ona tali ai le sua a le mamalu o le Palemene, mo le faia o tatou sutesuega. O le ala lea o le le mafai ona auai mai o le atunuu lautele ma sui o Matagaluega i a tatou taulumaga, ona o le taumafai lava e usitaia aiaiga o puipuiga. O le tatalo a le Fofoga Fetalai, ia tatou galulue faatasi mo le tausisia o aiaiga ma puipuiga ua faatulaga mai e le Kapeneta ma le tatou Ofisa o le Soifua Maloloina.

POLOAIGA O FAALAVELAVE TUTUPU FAAFUASEI

E faasilasila atu i le mamalu o le Palemene ua ou taulimaina nei le Poloaiga o Faalavelave Tutupu Faafuasei mo le Koviti-19, e pei ona faamaonia e Lana Afioga, O Le Ao o Le Malo, Tuimalealiifano Vaaletu'a Sualauvi II, i luga o

le Fautuaga a le Kapeneta e pei ona taua i lalo, mo le faataatiaina i le Laulau-a-Fono.

1. Poloaiga o Faalavelave Tutupu Faafuasei Numera 77, na amata faamamaluina i le itula e 12:01 i le taeao o le Aso Lulu, 20 o Aperila 2022 seia aulia le itula e 11:59 i le po o le Aso Lua, 3 o Me 2022.

SAUNOAGA O MALIU

Na faasilasila e le Fofoga Fetalai le tuumalo o nisi o tamalii sa avea ma sui usufono o le Palemene i tausaga ua mavae.

1. Afioga TUPUOLA Sola Siaso i le aso 19 o Fepuari 2022.

O le Afioga ia TUPUOLA Sola Siaso sa avea ma sui usufono o le Palemene mo le Itumalo Faa-alaalafaga o Siumu i le Paeaiga Lona X mai le tausaga 1988 i le tausaga 1991 ma le Paeaiga Lona XI mai le tausaga 1991 i le tausaga 1996. O ia o se sui o le Vaega Faaupufai a Samoa mo le Atinae o le Atunuu (Samoa National Development Party po o le SNDP).

I le Paeaiga Lona X, sa avea le Afioga ia TUPUOLA Sola Siaso ma sui usufono o le:

- (i) Komiti o Faalapotopotoga o Palemene o Malo o le Taupulega; ma
- (ii) Komiti o Galuega; ma le
- (iii) Komiti o Faamatalaga o Tupe a le Malo.

2. Ou te faasilasila aloaia atu foi le tuumalo o le Afioga ia VAELE Paiaaaua Iona Paiaaaua Sekuini i le aso 25 o Mati 2022.

O le Afioga a VAELE Paiaaaua Iona Paiaaaua Sekuini sa avea ma sui usufono o le Palemene mo le Itumalo Palota o Gagaifomauga Nu.2 i le Paeaiga Lona XVII o lo o faagasolo nei.

Na filifilia aloaia le Afioga ia VAELE Paiaaaua Iona Paiaaaua Sekuini i le Palemene o le atunuu i le Paeaiga Lona XVII o lo o faagasolo nei, i le aso 9 Aperila 2021 ma faatautoina i le aso 24 Me 2021, ma o ia o se sui o le Vaega Faaupufai a le Faatuatua i le Atua Samoa ua Tasi (FAST).

E faamanava e le Atua galuega a le Auauna, ua 10 masina talu ona aloaia lona Tofiga o le sui usufono o le Palemene.

Na faamaonia e le Fono Aoaofa o le Fono Aoaofa i le aso 14 Tesema 2021 le tofia ma le filifilia o ia e avea ma sui usufono o nisi o Komiti Faa-Palemene, e aofia ai le:-

1. Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae, ma le
2. Komiti o Tupe Maua ma Tupe Totogi.

E tuumalo le Afioga a VAELE:-

1. O loo ia tauaveina le Tofiga Taitaifono o le Komiti o Tupe Maua ma Tupe Totogi; ma
2. O lo o ia tauaveina foi le Tofiga Minisita Lagolago mo le Matagaluega o Faatoaga ma Faiga Faiva.

E avea ai lenei avanoa e fai ai au ma sui o le Palemene e molimoli atu ai faamafanafanaga ma faamaisega i itumalo pele, faletua ma nofo a alo, aemaise o aiga o afioga i sui usufono ona o le valaau paia a le Atua.

O le avanoa lenei ou te valaau atu ai ma le agaga mauualalo i le mamalu o le Palemene, ina ia tatou tutulai faatasi ma le filemu mo se minute e tasi, e faailoa ai lo tatou faaaloalo i sui usufono ua fai i lagi le folauga.

Na faaalua le agaga faaaloalo o le Maota e ala i lo latou tutulai filemu mo le minute e tasi, a o saunia e le Fofoga Fetala se tatalo.

TUUIA ATU O PEPA

Na tolaulauina e le Failautusi i le Fono Aoaofa le faasologa o Pepa e tusa ai ma T.T.49(2).

1. P.P.2021/2022, Nu.48, Lipoti Faaletausaga a le Matagaluega a le Palemia ma le Kapeneta mo le Tausaga Faaletupe 2020/2021;
2. P.P.2021/2022, Nu.49, Lipoti Faaletausaga a le Faalapotopotoga Malosi Faa-Eletise mo le Tausaga Faaletupe 2020/2021;
3. P.P.2021/2022, Nu.50, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2020/2021;
4. P.P.2021/2022 Nu.51, Lipoti Faaletausaga a le Pulega o le Suavai mo le Tausaga Faaletupe 2020/2021;

5. P.P.2021/2022 Nu.53, Lipoti Faaletausaga a le Iunivesite Aoao o Samoa mo le Tausaga Faaletupe 2020/2021.
6. P.P.2021/2022 Nu.54, Lipoti Faaletausaga a le Pulega o Felauaiga i le Laueleele mo le Tausaga Faaletupe 2020/2021;
7. P.P.2021/2022 Nu.55, Lipoti Faaletausaga a le Faalapotopotoga o Vaa a Samoa mo le Tausaga Faaletupe 2020/2021;
8. P.P.2021/2022 Nu.56, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga ma Agafesootai mo le Tausaga Faaletupe 2020/2021;
9. P.P.2021/2022 Nu.57, Lipoti Faaletausaga a le Matagaluega o le Soifua Maloloina mo le Tausaga Faaletupe 2019/2020.

Ma le faaaloalo lau Afioga.

LAFO A LE KOMISI FAA-PALEMENE

FOFOGA FETALAI: Ou te tapa lau Afioga i le Sui Fofoga Fetalai, ma o le Sui Taitaifono foi lea o le Komisi mo le lafo.

Afioga AUUPAAU MULIPOLA ALOITAFUA MULIPOLA (Sui Fofoga Fetalai, Taitaifono o le Komisi Faa-Palemene): Lau Afioga i le Fofoga Fetalai, e tusa ai ma Tulafono Tumau 170(2)(a)(c)(b), ou te tolaulauina suafa o sui usufono e pei ona fautuaina e le Komisi Faa-Palemene mo le faamaonia e le Fono Aoao e suitulaga i Komiti Faa-Palemene na tofia ai le Afioga ia Vaele Paiaaau Iona Paiaaau Sekuini ua tuumalo.

1. *Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae:-
Ua tofia i ai le Tofa ia Seuamuli Fasi Toma.*
2. *Komiti o Tupe Maua ma Tupe Totogi:-
Ua tofia i ai le Tofa ia Auuapaau Mulipola Aloitafua Mulipola.*

Ma le faaaloalo tele lau Afioga i le Fofoga Fetalai.

FOFOGA FETALAI: Ou te tapa ma le faaaloalo lau Afioga i le Tamaitai Palemia, Taitai o le Maota mo lau lafo.

LAFO A LE TAITAI O LE MAOTA

FOFOGA FETALAI: Ou te tapa ma le faaaloalo lau Afioga i le Tamaitai Palemia, Taitai o le Maota mo lau lafo.

Afioga Hon FIAME NAOMI MATAAFA (Palemia): Lau Afioga i le Fofoga Fetalai, sa e faalatalata i le Nofoalii o le Atua i lenei taeao e momoli le tatou taulaga faafetai e sulaina ai le alofa tulituliloa o le Atua i lenei Palemene ma si o tatou atunuu. Faamalo faafetai.

Ua faafofoga le Maota i lenei taeao i lau faasilasilaga mo nisi foi o sui usufono sa tautua i le atunuu e ala i le Palemene ua valaauina e le Atua e ala i le malaga a le maliu ma le oti. Ua aumai manino foi i lau faasilasialga i lenei taeao se tasi o ia tamalii le Afioga ia Vaele Paiaaaua Iona Paiaaaua Sekuini, sui usufono mamalu o Gagaifomauga Nu.2 sa avea ma sui usufono o le Komiti Suesue Faapitoa a le Palemene o lo o faaauau pea le latou suesuega i se mataupu tutoa na faasee atu i ai e le Fono Aoao e tusa o le lafo na faamaonia i le aso 1 o Fepuari 2022.

O le ala lea o le tulai atu lau Afioga ma le agaga faaaloalo ona o au na faatuina le lafo mo le tofiaina o lena Komiti. O lea ou te tulai atu ai, e talu ai ua le atoa le aofai o le Komiti sa tofia mo lea galuega, ou te faatuina ai le lafo e faapea, *Ina ia faamaonia e lenei Fono Aoao le tofia o le Tofa ia Seuamuli Fasi Toma, sui usufono mamalu mo Gagaemauga Nu.2 e avea ma sui usufono o le Komiti Suesue Faapitoa na tofia ma faamaonia i le aso 1 o Fepuari 2022, e suitulaga i le Afioga ia Vaele Paiaaaua Iona Paiaaaua Sekuini ua tuumalo.*

Faaluaina e le Afioga i le Sui Palemia ma le Minisita mo Faatoaga ma Faigafaiva.

Na faamaonia le lafo.

**TULAFONO TAU FAAOFI O TEUTEUGA O LE TULAFONO O
SOOTAGA VA LELEI O LEIPA MA GALUEGA 2022
– faitauga muamua**

FOFOGA FETALAI: Tulai mai lau Afioga i le Minisita mo Pisinisi, Alamanuia ma Leipa.

Tofa Hon LEATINUU WAYNE SOOIALO (Minisita o Pisinisi, Alamanuia ma Leipa): Ia, e muamua ona faatalofa i lau Afioga i le Fofoga Fetalai i lenei taeao, taeao fou, taeao totoa, taeao manuia. Ia viia foi le alofa o le Atua i Lona agalelei ua mafai ona maua ai lenei feiloaiga i lenei aso.

E le gata foi i lea, o le afio o le Afioga i le Palemia ma le Sui Palemia ma le mamalu o le Kapeneta aemaise foi Afioga i Minisita Lagolago. E faapena foi le afio o le Afioga i le Taitai o le Itu Agai, le Afioga ia Tuilaepa ma le mamalu o lena foi Itu.

Ae ua ou tulai i le agaga faaaloalo ina ia faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Sootaga Va Lelei o Leipa ma Galuega 2022 i lona faitauga muamua.*

Faaluaina e le Sui Palemia ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi o Teuteuga o le Tulafono o Sootaga Va Lelei o Leipa ma Galuega 2022 i lona faitauga muamua.

FOFOGA FETALAI: Mo le silafia e le Maota, o le taunuuga lea o galuega sa faatulaga mo tatou taualumaga o le aso Fono lenei. E fua lava tatou taualumaga i galuega ua mafai ona faatulaga ma ia tusa ai foi lona faagasologa ma aiaiga o tatou Tulafono Tumau. E pei foi ona saunoa nisi o le tatou Maota ananafi, e manaomia sina taimi e silasila ai i le tatou Tulafono Tau Faaofi mo le tapenaina o a outou saunoaga a o le i oo atu i le faagasologa e saausi ai a outou saunoaga i le Tulafono Tau Faaofi. O se laolao lelei foi lenei e matimati ai tapenaga o a outou saunoaga ae tatou te le i see atu i le faitauga faalua.

Mo le silafia e le Maota, talu ai ona o nisi foi o galuega taua o lo o feagai ma le Kapeneta, ia, o le a mafai ai foi ona faaaauu isi laasaga e ono tagofia ai foi nisi Tulafono Tau Faaofi, e moomia foi le auai atu i ai i o le Kapeneta, o le tasi lea mafuaaga o le tatou galuega i lenei aso. A o se avanoa foi e avatu ai se faamanatu a le Nofoa i a tatou Komiti Filifilia, Afioga i Taitaifono ma sui usufono o Komiti Faa-Palemene taitasi, e ao ona tausisia a tatou Tulafono Tumau ua aiaia e toe lipoti mai ai galuega na tuuina atu e le Fono Aoa mo le iloiloa. Ua molimauina e le Nofoa, e le o i ai se tulaga faapea. O le mea lea, e tele a tatou galuega o lena ua tuuina atu mo le iloiloa, e manaomia le tatou galulue faatasi aua le faagasologa o a tatou galuega.

O le taimi nei o lea ua tapena potu e 5 o le tatou Maota lea o Tofilau Eti Alesana mo le faatalanoaina o le tele o tatou galuega e manaomia lo tatou galulue faatasi.

O le mea lea, o le tatalo lena a le Nofoa, tatou Komiti taitasi, ia outou alofagia ia tatou galulue faatasi mo le tatou galuega. Ae momoli atu le faamalo ma le faafetai a le Nofoa i le paia o le Palemene mo le tatou fonotaga i lenei aso Fono.

E momoli atu foi le faafetai i le tapuaiga a Samoa i ona tafa e fia. Malo tapuai. O lo o ua maea tapena e le tatou Ofisa le taumafataga masani o le taeao e talisua ai le paia o le Palemene pe a o tatou tolopo.

Ae tatou te le i tolopo, ou te talosaga atu ma le faaaloalo i le sui usufono mamalu mai Falealupo se i e saunia se tatou tatalo faaii mo le tatou Fono.

Susuga Hon TUILAEPA AUELUA FATIALOFA SAILELE MALIELEGAOI (Taitai o le Itu Agai): Lau Afioga i le Fofoga Fetalai, ou te tatalo atu se i fai sina au upu faafetai i le tapuaiga a Samoa a o le i faia le tatou talosaga faaii.

Lau Afioga i le Fofoga Fetalai, e le o toe na ma le laina le usua o le tatou Fonotaga lenei. O lea foi ua taliu mai le sailiga fofu i Niu Sila o au nei ia faapea foi nisi o Minisita, sa matou auai i le taumafai lava ina ia maua le malosi faafualoa, aua galuega a le Maota. Ou te momoli atu ai le faafetai mo tapuaiga ma talosaga, e le gata i lau Afioga ae faapea foi i le Palemia ma le Kapeneta ma le na Itu, ia faapea foi lenei Itu o le Maota. E le o taumatea le molimoli atu o talosaga i lo tatou Alii, ina ia matou toe taliu mai ma le manuia, o lea foi e matau atu, o lea foi ua afio mai le Minisita ia Leatinuu na matou malaga faatasi mai.

E faamalo foi le galulue i lau Afioga i le Palemia ma le Kapeneta, faapena foi i lenei Itu. E tele lava faafitauli o lo o faafeagai, o luitau ia mo i tatou aemaise o le faafeagai ai ma galuega faaola mo le tau fofoina o le faamai, o lo o afaina ai si o tatou atunuu.

E faapitoa le faafetai i lau Afioga i le Minisita o le Soifua Maloloina i lou faamalosiua ma le afaigaluega. O le toatele o i latou ua gasegase, ia aua tou te faavaivai, leaga a outou faavaivai loa, ua afaina le toatele o si o tatou atunuu.

E le toe foi i tua se tala, e na o le pau o le mea o le agai i luma, togafitiga e tatau ona fai, faafogafoga mai foi lo tatou atunuu, e le o se galuega e na o outou ma tatou nei o le Maota, a o le galuega e aafia uma ai le atunuu atoa, alii ma faipule, faapea foi faletua ma tausii, i so o se tulimanu o Samoa. E tuutuu mai o latou tauau e tatou te fofoteleina le gasegase, o lo o faafeagai ma le tatou atunuu, aemaise foi o le afaigaluega o lo o feagai ma le togafitiga o latou o lo o mamai. Ia outou onosai, leaga a outou faatamala loa ua tele le afaina o i tatou uma, o fanau ma e matutua.

E faamalo foi le agalelei i feau faamanuia na tuuina atu ia i matou sa toesea i le tulaga o togafitiga a fofu, ia taunuu ma le manuia ai. O lea ua matou toe foi mai, o le a foi sau silasila mai i le matou tutulai atu, ua uma ona lipea uma mea faaletonu. E tuutuu atu ai o matou tauau i le galuega tele, e auala atu i tulaga masani o le matou tuualalo faale-Itu Agai, aemaise foi o le tatou galuega i totonu o tatou Komiti, o Komiti ole Palemene.

O i le faatinoga o galuega o galuega a Komiti o le Palemene e pei ona saunoa le Fofoga Fetalai, o le training ground lea o i tatou uma. E leaga o i lea e i ai le faatinoga i le tatou valaauina o Ofisa Sili o Matagaluega, e tala mai aao tatou te soalaupule, ma avatu i ai fesili ina ia malamalama e fautua ai le Maota lenei. Ina ia to le matupalapala o tatou itumalo o tapuai mai o tatou faiva, ae auala atu ia i latou o le afaigaluega a le Malo o lo o galulue ma tautua le Kapeneta. E faalologo i ai i latou i faatonuga e alu atu, e faaoga i ai lo latou tomai na foaifua mai e le Atua aua le tautuaina o Samoa.

O le mea lea e le uma le agaga faafetai lau Afioga i le Fofoga Fetalai, i le tapuaiga a Samoa i o tatou faiva, o le matou foi lena sao atu, e agai atu i fautuaga e tuuina atu. A o lea foi matou te iloa o matou o le itu vaivai. Pe a fai lava e amanaia se matou fautuaga faa-Itu Agai, ia faafetai. Ae a fai foi e le amanaia, a o lea ua fai le matou galuega, o lo o sisila mai le Atua na te tau le tagata ma lana galuega.

O le ala lea o lou tulai atu i lenei taeao, e faamalo le tofa i le tulaga ua faapuupuuna ai le tatou Fono i le aso, se i lava foi le taimi matou te faitau ai i le Tulafono leni ina ia atoatoa so matou sao, aua e leaga foi le faatopelau o a tatou mataupu, aemaise le Tulafono na faitauina nei, e aafia uma lava o tatou tiute. O i tatou e faia tonu a le Malo, i le va feagai ai ma le aufaigaluega a le Malo, aemaise foi o le aufaigaluega lautele i le va feagai ai ma pisinisi. Aua a manuia le latou faatinoga o latou galuega, ua manuia foi le atunuu, manuia foi i tatou uma.

Ia alofa le Atua pulepuletetele, e fesoasoani mai pea ia i tatou.

Ia faamaise foi le Atua i le agaga faanoanoa i aiga, aiga o le Afioga ia Vaele o le matou Taitaifono, o se Taitaifono tomai, o se Taitaifono e matua leai lava ma se tulaga e aliali ai se faaauau. Ia faamaise le Atua. Sa togi lana maa, faamaise foi i le itumalo. Ia faapea foi ona avatu le faamaisega i le Afioga ia Patu Siaosi, Semo Hunt ma lana ia foi tautua i le matou taimi. Sa matou galulue ai, o lea e tau tomanatu o le tausaga 1988, na matou galulue ai i totonu o le Maota leni, ua lava foi lona sao aemaise lava i le taimi sa galue ai i totonu o le Komiti o Tupe, i fautuaga aoga sa tuu mai i totonu o le tatou Maota nei.

O se faafetai lea lau Afioga i le fofoga Fetalai. Ia faamanuia mai le Atua i lo tatou Maota nei. Soifua ma ia manuia, aemaise le atunuu o lo o tapuai mai o tatou faiva.

FOFOGA FETALAI: Ua malo saunoa i lau Afioga i le Taitai o le Itu Agai.

Tulai mai lau Afioga i le Palemia mo lau saunoaga.

Afioga Hon FIAME NAOMI MATAAFA: Ia faafetai i lau Afioga i le Fofoga Fetalai mo le avanoa. Ua matauina ma le totoa le folasaga mulimuli a lau Afioga i le Fofoga Fetalai, e tusa ai ma le faagasologa o tatou galuega. O lea foi ua saunoa le Taitai o le Itu Agai, e tusa ai foi ma le autovaa atu i atunuu mamao e saili malosi, e le gata i lea o nisi o le Maota i nisi o Afioga i Minisita ma afioga i sui usufono.

Ma e faapena le agaga o le faafetai i le alofa o le Atua, ua faaatoatoaina ma toe faafouina le soifua maloloina, aemaise mo le tatou valaauina ma le galuega leni.

Ou te tulai atu lau Afioga e tuliloa le agaga o le faagasologa o a tatou galuega, aemaise o lea ua faataoto i luga o le Laulau-a-fono le Poloaiga o

Faalavelave Tutupu Faafuasei, i lona faagasologa mai, ma lona taatia i le taimi lenei, o lo o faaauau pea.

Ma o manaoga ia o le Tulafono, a faapena ona fonoa le Maota Fono o Samoa, ona faataatia lea o le tatou Poloaiga lea mo le silafia.

Lau Afioga i le Fofoga Fetalai ma le mamalu o le Palemene, e masalo ua ova nei ma le 2 tausaga o tatou savalia pea le faamalumalu mai pea le Poloaiga lenei tau faalavelave faafuasei, aemaise o le feagai ai o le atunuu ma le faamai o le Koviti-19. Ma ua tele lava aafiaga o le atunuu, ma ua oo mai foi i le Palemene ma ona tiute tauave, lea ua tatou molimauina. E i ai a tatou galuega tuua, ua faafaigata ona tuliloa aemaise le pitolaau a le nofoa-komiti, o le agaga foi lena, lau Afioga i le Fofoga Fetalai. O lea ua talatala atu a tatou vavao i lenei vaitau, ua tatala galuega, e le gata i le Malo ae faapea foi i Pisinisi tumaoti, e faapena foi i galuega a le Palemene.

O matou foi i le Kapeneta talu a tatou vavao nei, ua matou fonu i luga o upega tafailagi, ou te iloa e faafaigata ona faatino le tulaga lena mo le Palemene, ae o lo o faaavanoa pea i lalo o le tatou Poloaiga, le avanoa e mafai ona galulue ai pea le Kapeneta ma le Palemene i taimi ia, ae tatau pea ona faaauau.

E vaai atu ma le lagona faafetai, o lo o faapena ona tapenapena lau Afioga ma le tatou Ofisa o le Fono i tulaga o le soifua maloloina ma le puipuiga o i tatou uma mai faamai, ae faaauau pea a tatou galuega.

E pei o le itu lena lau afioga e tuliloa ai, o lena foi ua saunoa mai le Taitai o le Itu Agai i le tatou galuega, ia e manaomia. E vaai atu i le tatou Pepa o Galuega, e tele a tatou pepa ua tuuina atu, o le talosaga lena i le nofo a Taitaifono ma le mamalu o sui o komiti, e faaoga foi le tatou taimi lenei e faaauau ai ia fonotaga a tatou komiti ma tapena mai a tatou lipoti i le tulaga o le faagasologa o a tatou galuega. O se faaopoopoga lena, i lau Afioga, faafetai o lo o tuufatasia lo tatou faamoemoe, ina ia mafai ona faaauau a tatou galuega i ala e manino, ia ma lava le taimi e faapena ona fai ai a tatou soalaupule ma tonufai foi, aua se finagalo o le Palemene.

Ia manuia lenei aso faafetai.

FOFOGA FETALAI: Ua faamalo faafetai saunoa lau Afioga i le Palemia aemaise foi le Taitai o le Itu Agai. E le toe faasilia foi se leo o le Nofoa, i fautuaga ua tuuina atu i a tatou Komiti, ia o lea ua pau le saunoaga a le Afioga i le Palemia, ia aemaise foi le lagolago mai o le Taitai o le Itu Agai ina ia o tatou galulue faatasi.

E ui lava ina o lo o i ai tatou i puipuiga, ia ae tatou taumafai i le mea e gata ai lo tatou malosia, ina ia faatino ai a tatou galuega. Ia faafetai foi o lea ua maua le avanoa e avatu ai se faafetai a le Taitai o le Itu Agai i le tapuaiga lau Afioga i le Palemia ma le Kapeneta aemaise le Maota Fono o Samoa, ia malo faafetai. O lea ua outou faafogaina le agaga o le faafetai, ia aemaise foi o le Afioga i le Minisita sa toesea ia ma nisi foi o lea ua taunuu manuia

mai. Ia e ui lava ina tatou talia foi nisi foi o toe saili togafiti atu, ia o tatou faamoemoe i le Atua. O le Atua lava e maua ai lo tatou fesoasoani o lo tatou maluapapa, maua ai foi lo tatou toomaga. O le mea lea ia manuia le latou sailiga togafiti manuia foi ia le tatou Palemene.

Ia ou te tapa lau Afioga i le sui usufono mamalu mai Falealupo, e faaiu mai ia le tatou Fonotaga i se tatalo.

Na tolopo Taulumaga a le Fono Aoaofaitulafono i le itula e 10:12 i le taeao seia aulia le itula e 9:30 i le taeao o le Aso Faraile, 29 o Aperila 2022.